

汾陽縣志卷之四

名宦

刁清穆雙字子山。渤海饒安人。少好學。兼涉文史。雅爲中山王英所知。賞拜西河太守。正光初。中山王熙之誅也。熙弟畧投命於雙。雙護之周年。時購畧甚切。畧乃謂雙曰。我兄弟屠滅已盡。唯我一身。漏刃相託。卿雖厚恩。久見容蔽。但事留變生。終恐難保。脫萬一發覺。我死分也。無事相累。卿若送吾出境。便是再生之惠。如其不爾。輒欲自裁。雙曰。人生會有一死。死所難遇耳。今遭知己。視死如歸。願不以爲慮。畧後苦求南轉。雙乃遣從子昌

送達江左。靈太后返政。知畧因雙獲免。徵拜光祿大夫。莊帝初。以功封曲城鄉男。興和三年卒。謚曰清穆。

裴良。字元賓。河東聞喜人。時汾州吐京薛羽等作逆。以良兼尚書左丞。爲西北道行臺。值別將李德龍爲羽所破。良入汾州。與刺史汝陰王景和及德龍率兵數千。憑城自守。景和薨。以良爲汾州刺史。加輔國將軍。行臺如故。先是官粟貸民。未及收聚。仍值寇亂。至是城民大饑。人相食。賊知倉庫空虛。攻圍日甚。死者十三四。良以饑窘。因與城人奔赴西河。汾州之治西河。自良始也。

右北魏二人。舊志列周虞子羔。莫起。漢杜延年。郭伋。

魏房豹。晉王雅刁雙張軌。後魏王慶。西魏韓褒。宇文
測。考縣境於兩漢皆不屬西河郡。漢以前之西河。於
此地尤絕不相涉。辨已詳沿革。房豹。北齊世祖時爲
西河太守。誤繫之魏。而列於晉前。謬也。王雅。北周明
帝初爲汾州刺史。誤繫之晉。周書列傳云。王雅字度
容。闡熙新固人。世宗初除汾州刺史。勵精爲治。人庶
悅而附之。自遠至者七百餘家。舊志訛作新門人。又
云。後拜少傅。孝武將擢王恭。殷仲堪。雅曰。仲堪謹於
細行。幹畧不長。帝不聽。此乃晉之王雅。字茂達者。東
海剡人。孝武深加禮遇。時人被以佞倖之目。山西通

志作太寧初爲汾州刺史則又誤以北周明帝爲晉明帝晉王雅以隆安四年卒時年六十七而明帝太寧初下距隆安四年凡七十八年是大寧初尙未有王雅其人且汾州之名起於北魏晉無是名又晉太寧時此地屬石勒孝武世此地屬苻堅尋屬慕容垂晉無此地也北周之汾州在今霍州平齊後廢齊之汾州其郡縣屬介州亦絕不涉此地舊志於張軌僅西河著德四字別無所詳考晉書張軌傳永寧初出爲涼州刺史後張越陰圖代軌遣兄鎮移檄廢軌軌以子寶爲中督護率兵討鎮遣鎮外甥太府主簿令

狐亞前喻鎮曰舅何不審安危明成敗主公西河著

德兵馬如雲然則西河著德四字蓋綴取令狐亞稱

張軌者其所謂西河乃晉涼州之域

晉涼州領金城西平武威張掖

西郡酒泉敦煌西海凡八郡

黃河上游去此絕遠王慶北周大象

元年爲汾州刺史誤繫之後魏韓褒北周保定三年

爲汾州刺史誤繫之西魏宇文測大統中行汾州事

乃西魏所置之汾州在今陝西宜川縣皆茫然不察

今訂正

房豹字仲幹東清

河繹幕人體貌開岸美音儀河清中

除謁者僕射拜西

河太守地接周境俗雜稽部豹政貴

清靜甚著聲績遷
稱爲美政齊滅遂
疾終於家

時陵太守又遷樂陵太守風教修理
本鄉邱園自養頻被徵命固辭以

右北齊一人舊

志於名宦祠列之三國魏山西通志

於職官亦列之

三國魏於名宦列之北魏胥誤今改

正

蕭大園字仁顯梁簡文帝之子也幼而聰敏神情俊悟
年四歲能誦論語孝經及三都賦七歲居母喪便有成
人之性梁大寶元年封樂梁郡王屬侯景肆虐簡文見
弑大園潛逃獲免明年景平大園歸建康改封晉熙郡

王大園以世多故恐讒愬生焉恒以讀詩禮書易爲事
元帝嘗問五經要事數十條大園辭約指明應答無滯
帝甚歎美之隋開皇初拜內史侍郎出爲西河郡守大
園性好學務於著述撰梁舊事三十卷寓記三卷士喪
儀注五卷要決兩卷并文集二十卷

右隋一人

薛大鼎字重臣蒲州汾陰人父粹爲隋介州長史義旗
初大鼎於龍門謁高祖以功遷涪州刺史累徙滄州是
時鄭德本在瀛州賈敦頤爲冀州皆有治名故河北稱
鎗腳刺史永徽中遷銀青光祿大夫行荊州大都督長

史卒謚曰恭

楊越宏農仙掌人太宗初定天下網羅遺逸越曰天下有道可以出而見矣乃以角巾褐衣應命太宗曰石州邊方未沾主化汝往輯禦以息邊患授石州方山令楊隆禮煬帝曾孫景雲中汾州刺史性清嚴能檢察人吏欺隱殆絕開元中封宏農郡公授戶部尚書卒

崔隱甫貝州武城人隋散騎侍郎儵之曾孫也解褐左玉鈐衛兵曹參軍遷殿中侍御史內供奉浮圖惠範倚太平公主脇人子女隱甫劾狀反爲所擠貶邛州司馬元宗立擢汾州長史兼河東道度支營田使遷洛陽令

梨園弟子胡鵬善笛有寵嘗負罪匿禁中帝以他事召
隱甫從容指曰就卿丐此人對曰陛下輕臣而重樂工
請解官再拜出帝遽謝與胡鵬隱甫殺之有詔貫死不
及矣賜隱甫百緡後拜東都留守封清河郡公卒贈益
州大都督謚曰忠隱甫所至潔介自守明吏治以強正
稱始帝欲相隱甫謂曰牛仙客可與語卿常見否對曰
未也帝曰可見之隱甫終不詣他日又問對如初帝乃
不用

徐堅字元固湖州長城人世客馮翊梁慈源侯整五世
孫也堅幼有敏性沛王聞其名召見授紙爲賦異之十

四而孤及壯寬厚長者舉秀才及第爲汾州參軍事後累遷給事中封慈源縣子睿宗初進東海郡公元宗改麗正書院爲集賢院以堅充學士副張說知院事帝大酺集賢幔舍在百司上說令揭大榜以侈其寵堅見遽命撤之曰君子烏取多尙人堅於典故多所諳識凡七當譔次高選卒贈太子少保謚曰文。

杜希望京兆萬年人重然諾所交游皆一時俊傑屬吐蕃攻勃律勃律乞歸右相李林甫方領隴西節度故拜希望鄯州都督知留後馳傳度隴破烏莽衆斬千餘級進拔新城振旅而還擢鴻臚卿於是置鎮西軍希望引

師部分塞下。虜悉衆爭壇泉。希望大小戰數十。俘其大酋至莫門。焚積蓄卒城而還。授二子官。宦者牛仙童行遷。或勸希望結其驩。答曰。以貨藩身。吾不忍。仙童還奏。希望不職。下遷恒州刺史。徙西河太守。而仙童受諸將金事泄。抵死。昇金者皆得罪。希望愛重文學。門下所引如崔顥等。皆名重當時。

陸瓌字仲采。蘇州人。舉明經。補長安尉。以清幹稱。開元初。改新鄉令。人爲立祠。後除洛陽令。時車駕在洛。摧勸姦豪人不敢犯。爲中書令蕭嵩所器重。嵩罷。他宰相俾陰廉嵩短。瓌曰。與人交。過且不可言。况無有邪。以是忤

貴近出爲太原少尹累徙西河太守封平恩縣男屬邑多虎前守設檻穽臻至徹之而虎不爲暴

薛從字順之絳州龍門人仁貴之四世孫以蔭授左清道率府兵曹參軍累遷汾州刺史隄文谷瀘河二水引溉公私田汾人利之徙濮州儲粟二萬斛以備凶災擢將作監終左領軍衛上將軍贈工部尚書

崔昭襄圓字有裕貝州武城人開元中以鈐謀對策甲科累遷爲劍南左司馬知留後元宗西出次扶風遷御史中丞劍南節度副大使圓初聞難治城浚隍列館宇儲什具帝次河池圓疏具陳蜀土腴穀美儲供易辦帝

省書泣下曰。世亂識忠臣。卽日拜中書侍郎同中書門下平章事。仍兼劍南節度使。至德二載。遷中書令。封趙國公。後削階封李光弼表爲懷州刺史。改汾州。以治行稱。徙淮南節度使。卒。謚昭襄。

李貞簡。勉字元卿。鄭惠王元懿曾孫也。勉少喜學。內沈雅。外清整。始調開封尉。汴州水陸一都會。俗厯錯號難治。勉摧姦決隱。爲有名。從肅宗於靈武。擢監察御史。遷司膳員外郎。關東獻俘百。將卽死。有歎者。勉過問。曰。破脅守官。非敢反。勉入見帝。曰。寇亂之汙。半天下。其欲澡心自歸。無繇。如盡殺之。是驅以助賊也。帝馳騎完宥。後

歸者日至。天子素重其正，擢太常少卿。欲遂柄用，而李輔國諷使降禮於已，勉不爲之屈。乃出爲汾州刺史。興元初，拜檢校司徒平章事，卒，贈太傅，謚曰貞簡。勉少貧，客梁宋，與諸生共逆旅。諸生疾且死，出白金曰：「左右無知者，幸君以此爲我葬。」餘則君自取之。勉許諾，旣葬，密置餘金棺下。後其家謁勉，共啟墓，出金付之。位將相，所得棒賜悉遺親黨。身歿無贏藏。其在朝，鯁亮廉介，爲宗臣表。禮賢下士，有始終。嘗引李巡、張參在幕府。後二人卒，宴飲仍設虛位，沃饋之。遣戍兵常視其資糧。春秋存問家室，故能得人死力。善鼓琴，有所製，天下寶之。

賈元靖耽字敦詩滄州南皮人天寶中舉明經河東節度使王思禮署爲度支判官累進汾州刺史治凡七年政有異績召授鴻臚卿兼左右威遠營使貞元九年以尙書右僕射同中書門下平章事封魏國公卒贈太傅謚曰元靖耽嗜觀書老益勤尤悉地理爲圖廣三丈縱三丈三尺以寸爲百里本之禹貢及班固漢書古郡國題以墨今州縣以朱刊落疎舛多所釐正又著貞元十道錄其器脩然蓋長者也不喜臧否人物檢身勵行家
人近習不見其喜愠

劉暹曹州南華人爲汾州刺史天資疾惡所至以方直

爲觀察使所畏。建中末，召爲御史大夫。宰相盧杞憚其嚴，更薦前河南尹于頔代之。遷終潮州刺史。

孔巢父，字弱翁，少力學，隱徂徠山。建中初，涇原節度留後孟皞表巢父試秘書少監，兼御史中丞、行軍司馬。尋拜汾州刺史，入爲諫議大夫。興元中，李懷光擁兵河中，以巢父兼御史大夫，充宣慰使。遇害，帝聞之震悼，贈尚書左僕射。

李說字巖甫，淮安靖王神通之五世孫也。馬燧節度太原，辟說署少尹，遷汾州刺史。李自良代燧，復奏爲少尹，擢檢校禮部尚書、節度使，累封隴西縣男。說精於職，卒。

贈尙書右僕射

裴向字僚仁絳州聞喜人父遵慶上元中同平章事廣德初僕固懷恩阻兵汾上代宗以遵慶忠純特遣往汾州宣慰見懷恩具陳朝旨懷恩引過聽命將隨入朝旋爲范志誠所惑以懼死爲辭會乘輿幸陝遵慶自汾州奔赴行在向少以門蔭歷官至太子少議郎德宗末方鎮之副多自選於朝以待有變次授之故向以選爲太原少尹行軍司馬兼御史中丞改汾州刺史轉鄭州向以學行自飭歷官仁智推愛利及於人以吏部尙書致仕內外親屬百餘人向所得俸祿必同其費世稱其孝